

Na osnovu člana 24. Statuta Općine Hadžići („Službene novine Kantona Sarajevo“, broj: 15/09,17/12,10/13, 14/13-ispravka,11/18 i 1/20) i člana 184. Poslovnika Općinskog vijeća Hadžići- Prečišćeni tekst („Službene novine Kantona Sarajevo“, broj: 7/18), Općinsko vijeće Hadžići na 22. sjednici održanoj dana 13.04.2023. godine d o n o s i

## ODLUKU

o izmjenama i dopunama Poslovnika Općinskog vijeća Hadžići

### Član 1.

Ovom Odlukom vrše se izmjene i dopune Poslovnika Općinskog vijeća Hadžići – prečišćeni tekst („Službene novine Kantona Sarajevo“, broj: 7/18).

### Član 2.

U članu 1. stav 1. tačka 12. Poslovnika vrši se dopuna na način da se umjesto rastavnog veznika „ili“ stavi zarez, a na kraju teksta briše tačka i dodaju riječi:

„ili u drugim situacijama kada se Vijeće ne može sastati“

### Član 3.

Član 5. mijenja se i glasi:

„Vijećnik ima pravo na novčanu naknadu utvrđenu posebnom odlukom.“

### Član 4.

Član 13. mijenja se i glasi:

„Vijećnik ima pravo uvida u informativni i dokumentacioni materijal koji se izrađuje ili prikuplja u općinskim službama, a koji se odnosi na pitanja o kojima se raspravlja u Vijeću.“

### Član 5.

U članu 31. stav 1 mijenja se i glasi:

„U stalna radna tijela mogu se imenovati i vijećnici“

### Član 6.

U članu 53. stav 1., iza riječi „smrcu“ dodaje se nova tačka koja glasi:

„Na zahtjev Kluba vijećnika koji ga je predložio u stalno ili povremeno radno tijelo“.

## Član 7.

U članu 66. stav 2 riječi „pet minuta“ zamjenjuju se riječima „tri minuta“

## Član 8.

U članu 68. stav 3 riječi „pet minuta“ zamjenjuju se riječima „dva minuta“

U članu 68. dodaje se stav 4 koji glasi:

„Vijećnik može zatražiti pravo na repliku da bi ispravio navod koji može izazvati nesporazum ili zahtijeva objašnjenje. Predsjedavajući će replikantu dati riječ odmah po završetku izlaganja govornika koji je izazvao repliku, a ista može trajati najduže dva minuta. Replika istom govorniku, po istom pitanju, od strane jednog vijećnika dozvoljena je najviše jednom“.

## Član 9.

Član 71. mijenja se i glasi:

„Za povredu reda na sjednici smatra se: nepridržavanje odredbi Poslovnika; nedolično i uvredljivo ponašanje prema učesnicima i prisutnima na sjednici; neodobreno audio i video snimanje; i ometanje normalnog rada na sjednici.

Za povredu reda na sjednici predsjedavajući može opomenuti vijećnika, oduzeti mu riječ, a ukoliko ovaj nastavi sa povredom reda, može ga udaljiti sa sjednice.

Predsjedavajući može narediti da se iz sale sa sjednice udalji svaki slušalac, građanin koji prati rad na sjednici ako narušava red.

Ukoliko vijećnik u kontinuitetu narušava red i rad sjednica Općinskog vijeća i ukoliko je opomenut dva i više puta, predsjedavajući vijeća ima obavezu da Komisiji za Etički kodeks uputi pismeni zahtjev za ocjenu kršenja Kodeksa i utvrđivanje eventualnih sankcija o čemu Odluku donosi Općinsko vijeće natpolovičnom većinom.

## Član 10.

Član 72. mijenja se i glasi:

„Lica koja se za vrijeme sjednice nalaze u Sali po službenom poslu, dužna su u pogledu održavanja reda izvršavati naloge predsjedavajućeg.

Za održavanje reda, na poziv predsjedavajućeg vijeća, zadužena je Služba za opće poslove Općine Hadžići.

Ukoliko nije moguće izvršiti stav 2 predsjedavajući OV može pozvati pripadnike PS Hadžići na intervenciju.

Ako predsjedavajući Vijeća ocijeni da ne može održati red na sjednici, odlučit će o prekidu sjednice i o nastavku rada kada se za to steknu uslovi.“

## Član 11.

Iza člana 76. dodaje se novi član 76a. koji glasi:

„Informacije koje se dostavljaju Vijeću razmatraju se, ali se o njima ne glasa.

Ako tokom razmatranja informacije bude podnesen prijedlog zaključka, o tom prijedlogu se glasa i ukoliko bude usvojen donosi se odgovarajući zaključak“.

#### Član 12.

U članu 77. dodaju se novi stav 2 i 3 koji glase:

“Predlagač ili predstavnik predlagača, kao i izvjestioci o informacijama, izvještajima i sl., mogu govoriti do 10 minuta, a izuzetno i po odobrenju predsjedavajućeg do 15 minuta.

Predlagač može do kraja rasprave povući materijal o čemu se ne glasa.“

#### Član 13.

U članu 79. dodaju se stavovi 2 i 3 koji glase:

„Nakon zaključenja rasprave predlagač ili predstavnik predlagača odgovara na postavljena pitanja i daje dodatna obrazloženja na diskusije koje su bile u toku rasprave, najduže do 5 minuta, a izuzetno i po odobrenje predsjedavajućeg do 10 minuta.

Poslije davanja odgovora na pitanja od strane predlagača nema ponovnog otvaranja rasprave niti postavljanja pitanja.

Vijećnik koji nije dobio odgovor ili nije zadovoljan odgovorom može predlagaču postaviti pitanje u pisanoj formi“.

#### Član 14.

U članu 83. stav 1. mijenja se i glasi:

„ Ako Vijeće odluči da se o određenom pitanju glasa tajno zadužit će Komisiju za izbor i imenovanja ili će formirati Komisiju za tajno glasanje od tri člana koja će rukovoditi glasanjem i utvrditi rezultate.“

#### Član 15.

U članu 118. stav 3 mijenja se i glasi:

„Amandman na prijedlog akta podnosi se najkasnije 72 sata prije termina određenog za održavanje sjednice Vijeća na kojoj će se raspravljati o donošenju akta“.

#### Član 16.

U članu 134. vrši se izmjena na način da se brišu riječi „Stručna služba Vijeća“, a umjesto njih treba da stoji „sekretar Općinskog vijeća“.

#### Član 17.

U članu 159. stav 2 mijenja se i glasi:

„Jedan vijećnik može na jednoj sjednici postaviti jedno vijećničko pitanje“

#### Član 18.

U članu 162. stav 3 se mijenja i glasi:

“Ukoliko vijećnik nije zadovoljan odgovorom, može postaviti to isto pitanje u pismenoj formi.“

Stav 4 se briše.

#### Član 19.

U članu 164. stavovi 2 i 3 mijenjaju se i glase:

„Odgovor u pisanoj formi, u pravilu, dostavlja se predsjedavajućem u roku od 30 dana.

Predsjedavajući dostavlja odgovor vijećniku na prvoj narednoj sjednici nakon prijema odgovora.“

#### Član 20.

Član 165. mijenja se i glasi:

„Vijećnik ima pravo pokrenuti jednu inicijativu i to u pisanoj formi na sjednici Općinskog vijeća uz pismeno obrazloženje inicijative.

Ukoliko inicijativa zahtijeva finansijska sredstva predlagač inicijative je obavezan predložiti detaljan model finansiranja koji će obuhvatiti informacije o tome koje stavke budžeta se umanjuju i usmjeravaju na finansiranje predmetne inicijative.

Vijećničke inicijative čiji sadržaj zahtijeva šira sagledavanja sa aspekta finansijskih sredstava, konsultaciju organa višeg nivoa vlasti i proučavanje relevantnih propisa, prije izjašnjavanja Općinskog vijeća, a radi prethodne ocjene dostavljaju se Općinskom načelniku koji se o njoj izjašnjava do jedne od narednih sjednica Općinskog vijeća, a najduže 60 dana od pokretanja inicijative. Nakon izjašnjenja Općinskog načelnika vijećnici će se izjasniti o prihvatanju ili neprihvatanju inicijative natpolovičnom većinom.

O realizaciji prihvaćene inicijative Općinsko vijeće će biti pravovremeno informisano od strane Općinskog načelnika.“

#### Član 21.

U članu 178. dodaju se stavovi 2 i 3 koji glase:

Obavještanje javnosti o radu Općinskog vijeća vrši i nadležna općinska služba putem zvanične web stranice Općine Hadžići.

Neodobreno audio i video snimanje i objavljivanje video i audio snimaka sa sjednica vijeća od strane prisutnih uključujući vijećnike, načelnika, službenike, goste i druga prisutna lica smatra se povredom člana 71. Poslovnika.

Ukoliko predsjedavajući ili vijećnici utvrde da je došlo do kršenja stava 2 ovoga člana, predsjedavajući općinskog vijeća će primijeniti član 71. Poslovnika.

#### Član 22.

U poglavlju XIII – RAD VIJEĆA U VRIJEME VANREDNIH OKOLNOSTI, RATNOG STANJA ILI U SLUČAJU NEPOSREDNE RATNE OPASNOSTI vrši se dopuna tako što se dodaju riječi:

„ILI U DRUGIM SITUACIJAMA KADA SE VIJEĆE NE MOŽE SASSTATI“

Član 23.

Iza člana 183. dodaje se novi član 183a. koji glasi:

Sjednice Općinskog vijeća, Kolegija Općinskog vijeća i radnih tijela Općinskog vijeća se u situacijama kada se Općinsko vijeće, Kolegij Općinskog vijeća i radna tijela Općinskog vijeća nisu u mogućnosti sastati, mogu održavati i online – elektronskim putem, odnosno putem video-linka ili video konferencijskog softvera, a u skladu sa tehnološkim mogućnostima.

O načinu održavanja sjednica Općinskog vijeća Hadžići i Kolegija Općinskog vijeća odlučuje Kolegij Općinskog vijeća, a o sjednicama radnih tijela predsjednik radnog tijela.

Rad Općinskog vijeća Hadžići, Kolegija Općinskog vijeća i radnih tijela Općinskog vijeća i u slučaju zakazivanja i održavanja online sjednica nastavit će se po odredbama Poslovnika Općinskog vijeća.“

Član 24.

Ova Odluka stupa na snagu danom objavljivanja u Službenim novinama Kantona Sarajevo.

Broj: 01-02-3771/2023  
Hadžići, 13.04.2023. godine

Predsjedavajući  
Općinskog vijeća Hadžići

Almin Bašić